

四庫全書

集部

欽定四庫全書

九華集卷十一

宋 員興宗 撰

策

孔孟王通公孫弘能言國之興衰短長策

元魏闕子明易老師也其言興衰如龜兆然彼闕子何以知之蓋以易而知之故自黃初之年八十四更八十二暮三百歲六十有六焉曰道之行乎此時也如見用者王道其振乎闕子深于易灼知後此事逆期如此彼

孔子者深于道者也孔子而有不知乎凡孔子指諸侯
言大夫十世之失可以勝殘可以去殺可以有成百年
三年之期非故知也生而知之也由孔子而視闕子闕
子不亦鑒哉北齊祖孝徵名臣也有所不言言未嘗不
證國人是之神武亦是之即日議三十六事他日此事
無事不合今歲議事無歲不合孝徵之智長于料事預
期如此况孟軻命世者也軻之道豈孝徵之徒歟凡孟
氏言什一之制可以用周公為政可以師文王名世之

可以興王者自何待來年或及于七百有餘歲或遠或近非誣也君子之言安可誣也由孟氏而論祖氏祖氏不亦少哉茲承問以聖賢於事非故言之皆逆知之首以孔孟之徒以次及王通公孫弘皆能言國之長短興衰愚以為聖人之權是權之于道道無所不知智人料事料出于智智蹙則敗矣孔孟者以道權者也孔子論勝殘去殺久則百年至有成止三歲而已非久近不倫也蓋當其時爭地以戰殺人盈野此非聖人百年用其力

能正之乎故勝殘者非百年不可若夫正其君臣比其父子歲月可也故三年有成猶周制三年小成之類也孔子之見卓矣孟子論行周公什一不待來年論行文王之政歲更六七亦非久近不倫也孟子周臣也所仕之國周國也仕周之國行周之制非今不可哉若當時諸侯則去文王蓋遠矣如五七歲有不忍人之政亦當時之文王也故曰是文王而已猶傳所謂桓文湯武之類是也孟子之見亦卓矣嗚呼孔孟以道權事故當時

後世無不可知之事事不足以權道雖知之有不可行之權如禮樂征伐諸侯十世大夫五世希不失矣孔子傷其漸云耳由辨之不早辨也不然周之盛時天子廟諸侯貢大夫供職孔子何不非乎凡王者之興不踰五百歲至周七百有餘其數則過也孟子傷其事云耳可以見而未之見也不然五百歲而無王者則堯舜禹君臣也而並文武周公父子而處孟子何不非乎至于後世公孫弘王通之徒獵孔孟之學以自名其料事于智

似矣不可與之言智也弘之言曰暮年而變三年而化
五年而定夫周公作周數世矣猶有商頑至于數世天
保定矣如此其難也五年而定周公所難弘所易弘言
可信乎王通曰十年平其盜富之和之三十年禮樂可
具傳曰禮樂積德百年而後興禮樂出于富和是何禮
樂之易也必以富乎鐘鼓云乎哉玉帛云乎哉通以為
言通言可信乎由是言之則事權于道道無不知也孔
孟以之事出于智智廢則敗也二子以之雖然聖人之

言以道權事其始隱隱一日而白豈不如日月然矣乎
其弊也諸儒若淫巫瞽史且立徵兆若曰五稔之後陳
氏必敗十世之後齊莫與京如是當黜之黜之何由曰
非道

行祖宗故事策

人君視細務如視四肢保故事如保元氣四肢廢猶可
以活身元氣一壞吾不知其為人吾觀漢唐之策而悲
之非悲其事也悲其壞故事方漢之興高帝文帝自有

制度蓋煥如也後世相非其人而變之相晁錯變侯國相張湯變布幣相元成變廟制所以變者欲為是新奇也景武知之則聽之孝元知之則用之嗚呼祖宗之法則不舉非其法則舉之非自厥其本哉是數相者意氣自用反指高文為無謀蕭曹為無策也噫太甚矣方唐之興太宗之故事真可法也後世相非其人則更之相張說變府兵相楊炎變租庸調相王涯變茶權所以變者欲冠冕前代也玄宗知之則聽之德文二宗知之則

用之嗚呼祖宗之法唐之諸相變其所可變行其所可行非識大體也是數人者反謂太宗為未審房杜為備員也噫亦陋矣由是言之漢制變而漢日衰唐制變而唐日壞故事何可不守也彼諸人專務變之不自悔罪豈徒有負于前人抑亦自負不少也雖然誰謂漢唐無人有人而適不用或用而不盡可為千載惜也條故事如魏弱翁識故事如蘇瓌明習故事如侯霸言合祖宗如李絳雖其言藥石畧聽用之惜其不盡也噫此漢唐

止于漢唐而已乎惟國家祖堯宗舜一時大臣皆中外望也以明佐聖利澤萬世甚厚甚惠然厯守一道以為必用故事必法祖宗如良醫之用藥方多取于古人不自用也故權酤一事也淳化寬之其後屢寬之籍田一事也雍熙行之其後屢行之至其他大者難以徧舉宜乎霄壤而視唐漢也茲承明問以本朝典章故事并諸元老之嘉言當官之建議茲事體大願陳其槩嘗原一代之治必有一代之體體之不同則事不同商尚質周

尚文周公非不欲質伊尹非不欲文體異也故今日之事有今日之體也祖宗之朝元老大臣聲嗟氣咳猶足以澤天下如魏公議邊蜀公議樂滕公議用人司馬公

議役石守道議

原本缺

蘇明允議機權至种隱君又議道

議治議仁議禮義凡作十議皆十世龜鑑也若上數公之言卷之則可以高一時舒之則可以範百世安可不舉行也雖然今日之體又有要而易守切而易用者三事而已所謂罷羨餘斥珠玉審刑罰是也李文靖在真

宗時嘗謂四方言利一切不進持此以報國當時何有
言羨餘哉潘美在太宗時請發渭川之都斤採珠之民
當時誰暇及珠玉哉王文正在真宗時上與議刑遂增
諸路刑官則刑罰之審有三代風矣是三者之急務今
日行之宜饑渴之不啻也主上睿聖加惠四海者由祖
宗故事也故斥珠玉而不進罷羨餘而不用戒刑罰而
不濫則李文靖等之策獲伸矣若夫漢唐之議家法故
事已畧陳于前矣嗚呼相距千載太阿一沉可以刻舟

求之哉

資治通鑑策

或謂先正司馬子曰衆人雖尚子書惜乎言雖多而太迂也司馬子曰聖人之言似乎迂高而不能卑也奧而不能邇也是以齟齬而或窮子患不迂耳矣嗚呼司馬不患衆謗而自患其學不畏衆言而畏聖言是以在元豐之際勞形休心馳騁上下千載間討正諸史當時未免病乎迂也故深研窮諦於是時有是事善可法而惡

可戒然後取之世謂之編年歲以首事以時繫歲以事
繫時例見於彼凡立於此此之謂總目也一說之真衆
說之偽真偽相駁也前志為有後志蔑焉有無相蓋也
今一語伸其中有無遂明真偽可了矣此之謂考異也
為編年為總目為考異此通鑑傑然於諸史之中所以
資治者歟考異班范而下字外文誤纖悉破碎雖古史
有彈誤者有正俗者有弭謬者然自吾觀之不勝其煩
也今考異之書辨同析異其功自名可謂不細哉其煩

不可徧以䟽舉吾舉其緊者所謂天道之䟽合人事之
怪異變故之推移月窮日廣庶乎有益也按漢祖元年
十月五星聚東井高允謂五星附日十月日在寅無所
謂金水二星者考異以允言為正唐元宗十八年正月
建酉厯家謂是月建戌無所謂酉者肅宗上元建丑祀
圓丘厯家謂是月乃戌無所謂丑者此天道之䟽合有
以取正也按舊志之言曹典窮治何晏使晏書獄肅宗
面叱李郭李郭仆地錢鏐坐筓諸吏諸吏怨望考異以

今志為正則人事之怪異於此可詳也太平用事宰相
七人五出其門唐歷以為四人未見其五也劉守光為
六鎮推尊即拜尚父舊志以為晉氏所推未見所以為
六鎮也穆宗二年集諸道兵六七八萬白居易以為計
七八十萬未見所謂六七八也此先志之不一與變故
之推移於是可明也

鄉飲策

禮所以裁節民欲者也民生有欲多欲則敗先王裁節

其欲未嘗不自遠也而未嘗自遠吾觀于鄉而見鄉飲
其未嘗忽于近者乎是故賓主一贊而百拜徜徉容與
不徒謀也致仕有德則謀之不徒賓也在衆而賢則賓
之不徒設也進士鄉貢則榮其禮孝悌旌表則尚其事
不徒象也或象日月或象天地或象三光不徒位也東
面北向尊者在東北面南向尊者在北介有介席僎有
僎次不徒飲也玄酒在西壺篚在南勺幕在邊不徒言
也司正揚觶則有言將命相旅則有言不徒歌也坐工

者歌鹿鳴笙入者歌南陔夫鄉飲之禮一設耳而節文如此其密先王非直為是廩廩也所以裁節民欲致化之由也

鹽法之弊策

天下有二病上知之下知之知之而不去何也勢不可也上取民必有以病民不取民必有以病國欲民之不貧而不取民則無怪乎國之無財欲財之不竭而不取民則無怪乎國之必困此二病也未嘗有兼利者也而

況夫鹽之利害利害之巨者也增其額則民納之不繼寡其取則國用之不給此執事之所患也請得而議其說夫執事之所患鹽之法弊非實弊也勢也其貨滯非實滯也勢也貨滯則縣官不便法弊則額戶不給貨滯矣愚為之策曰貿而不積宜行唐常平之法乎蓋官開糴而微其直則商多至商多至又百途以誘之陳陳之鹽無有也執事何患貨滯哉此便國之法也法弊矣愚為之策曰緣額益分宜師唐多亭戶之說乎蓋游民集

則亭戶衆亭戶衆而額戶之勢分勢分則輸繇於縣官
益均而輕矣執事何患法弊哉此便民之法也夫一舉
而國與民皆便計司何憚而不行也若夫管仲兒寬劉
士安李巽張平叔裴休韋處厚乃當時一切之議正執
事所謂利於昔而不利於今者也韓退之曰鹽之利病
事貴精詳不可輕策故愚惟建一策陳前執事聞於計
司顧惠蜀民莫此為大

內重外輕策

問漢制九卿出為太守二千石高第入為丞相所以均
內外也然有出守淮陽不受印綬願出入禁闥者又有
出守平原雅意本朝內不自得者其故何耶唐制選京
官有才識者除都督刺史又有政迹者除京官亦所以
均內外也然入為王官則當時有登仙之歎或出而外
補則家人有降晚之恨抑又何耶恭惟國家聖聖相承
深監茲弊選用人才靡間中外淳化詔旨紹興政宏
規具在垂法萬世肆我聖上繼承丕緒臨御以來凡久次

中都者使之更迭補外以治民考功厥有治效著聞者則以次召旋加甄擢德至渥也然而重內輕外之弊猶自若其說安在豈士徇習俗廉退之節未厲而貪進之風日競邪抑朝列有定著州縣有常負除授或輕微倖者衆外濫則內冗耶不然何方來者無以處之而重去者猶攄攄也且監司守令其選亦重矣古者郎官出宰百里國初朝臣分治劇邑行之于今其于人情所安否乎或謂不歷都督刺史不得任侍郎列卿不歷縣令

不得任臺官給舍雖時移事異其說可行乎夫天下之勢如持衡然此重則彼輕此輕則彼重倘欲輕重適平無偏倚之患疏源導流要必有術諸君講之熟矣願茂明之以觀通世務之學

對言後世內重之弊者當言輕內之弊不當言重內也夫使上之人誠重內選而不輕畀天下之士大夫也則士皆策功自見于外以求超躡登用于內矣如是則不惟內重也而外且得人焉則外重隨之矣惟夫用人于

內者其名若重而實輕焉是以卒至于內外之俱輕方
一男子而皆有覬倖王官之心焉是猶謂之內重得乎
愚嘗汎觀天下大勢而竊慨嘆于士大夫之弊矣請因
明問之逮而深言之雖然亦將先要諸古人公天下之
道而後及于後世之私者焉其源流有自來矣夫自典
謨而降言治之近者莫如周成周之盛時至治之極于
斯時也周召毛原在朝端藹藹吉士在百官其相與圖
謀于上以經理一代之治者亦既悉矣其于外之官吏

雖無事乎一切之區處若未害治也而猶必取天下之
賢者以與天下共之蓋其公天下為心不獨私王朝以
自隘也故周公立政一書論文武得人之盛而至于夷
微盧之烝三亳版之尹皆以為有常之事其選無異于
三宅焉夫遐陬僻嶠卑官薄職委天下之賢而浼居之
無乃有所不安于心者耶而當時上下莫以為異蓋文
武周公惟知擇天下之賢以供吾事不見其為內外之
間士大夫委職為臣亦惟知盡吾職守而羨慕決擇無

所措于其間也況有如文武為君非棄賢之主周公為相非蔽賢之相其心事暴白于天下諸侯無相周公猶出居之以主東諸侯況其餘乎此成周之世所以君臣上下相忘乎直道之間也馴至後世無復古人公天下之意矣朝廷甚尊郡縣甚卑然猶可誨者曰所以重王朝之勢也萃之內地列置之天子之左右皆天下之選也吾以為雖非天下之公而猶未至盡出于私至末流之弊內重已甚而士大夫皆有慕內之心上之人又不

自愛其權而輕擇焉于是人人皆將苟得于其德業之所不逮內重之源于是為後世深弊而祇以為內之輕矣徇耳目之見者不深考其故而又欲任意矯枉于其間而尊外之權首抑則尾揚左支則右仆心有親疎則內外之弊如相倚伏于無窮此漢唐君臣所以徒自紛紛而卒無補于天下國家也吁成周之制其不可復乎夫後世之有天下吾非敢盡責以成周公天下之法也蓋使後世而真能重內抑外亦有可言者京師郡縣之

根本也根本治則枝葉將非所甚慮矣彼其建為公卿大夫列為百司庶府豈顧不重哉然所以有是者初非為士大夫計皆所以為天下計而其權蓋出于上也自夫上之人不重其權輕用之也則任官之本意已失始以朝廷之爵祿徇天下之士大夫倖門一開則德薄才卑者皆有思出位之心而睥睨于其間謀國者不反求諸其上而徒歸過其下一則曰是士大夫風俗之不立也二則曰是士大夫心術之不美也是豈知拔本塞源

之道上之人抑有可加之意乎且朝廷職事清望之選
豈非擢置天下人才之地二三大臣所當求下而非士
大夫所當求上者乎今世之士一登姓名于仕版則皆
不安于州縣請託營謁不遺餘力而其夤緣稍足自致
其身者則急起而乘之往往亦得之矣一日而致身內
地焉近者一二年遠者三數年視寺監丞簿如探囊取
物矣而其久者亦從而為之日月叙遷不幸而畀之外
馬亦不失郡刺史郡守之權視役身州縣跬足以進而

竟老死焉者相去何啻倍蓰也夫樂貧賤而輕富貴是
惟聖者能之也如之何而責士大夫之輻湊乎此而冀
其俛首帖耳乎彼也哉今世之官德薄而位高者可以無
無愧何也德又有薄于我者也亡功而厚祿者可以無
慙何也功又有寡于我者也三公之位人臣之極也而
人皆曰我能為之萬鐘之祿至貴之奉也而人皆曰我
能享之吾不知其果何習而見于四維方張之時耶夫
昔者帝王之世所謂爵祿品秩非以應士大夫之求而

選賢登俊皆上之人所好自為謀耳自一命以上莫不知盡其職而自以為終其身故上之建官分職坦乎無所徇于下也下之克己厲行確乎無所徇于上也後世僥倖之門未免一二可乘得之者或不足以厭服人心則繼至者已動心于其後矣接迹相尋來者源源而方無以處之上之人又從而遞遷迭易區處焉以求當其欲是豈所以振肅紀綱而尊嚴朝廷也乎朝廷不尊羣吏無乃懷苟且士大夫而有貪冒無恥之心乎員有常

限來者無常數也其已至者路壅于上而不得進欲進者肩摩于下而日未已也若是則盡朝廷之官若之何而勝處故愚以為誠能廣至公之道抑私絕之求毋使求者得之不求者不與任實而不求名循名而必責實如前輩所謂官爵非房闥中物以抑天下好進之吏則內果重矣必察守臣之有治效而非名實不相應者使之為郎必縣令之居官可紀而非以覓舉至者使之居臺察六院之寄必天下之有道術行藝者畀之清要之

地則凡為國以吏而分職于外者皆知盡心以求得於
內而思所以自見于世矣若是則不惟內重也而外且
重焉均內外之策孰大于此者不然徒見士大夫之奔
趨內地也而欲反其道以重外焉則唐中葉以來其弊
可鑒矣上方以禮義廉耻嬰士大夫之心而講宣洪化
之地且與植立此公道維持此公道而愚猶喋喋如此
亦深惡士大夫風俗有未滿人意者耳明問以公直策
愚愚不敢不以公直對幸執事以復于上

科目策

問漢初之士尚權謀喜功名而遠道德然時有磊磊可喜之節中世始興學校其後經術章明矣而世俗頽靡日益不振唐用科目為主詞章中間無慮三變乃始大成攷其世故每變輒下文之盛衰與時不相關何哉惟成周之士但論于鄉或選好學人才藹然何其盛也本朝取士近酌唐制學校之法遠稽成周而損益之二百餘年得人之效昭昭不可誣也近者廷臣建議以士業

苟且藝實漸廢欲因今科舉參取而更張之以孝悌廉
節行義明著淹習經史通于世務別為兩科取鄉舉三
分之一為之籍以隸于學以才實察舉于前以歲月作
成于後畧倣古者諸侯貢士之意而所舉之人則屬之
卿大夫士與耆老之可信者或謂俗敝久矣虛偽之風
殆將偕長夫漢崇學校而郡國猶存察舉唐用科目而
方鎮猶許辟置何古行之乃今不可歟將其為法科條
固殊可以並行而不悖歟三代之才教養作成書考論

辯賓興官使本末源委蓋深遠矣至其植之風聲以興起一世之士獨存乎法度之間歟夫欲得人兼漢唐之美而駸駸乎成周之盛且無變更之煩無末流之弊亦有自乎願諸君熟詳之

對論取士者不正其本于士之心術而舉其末于上之科目未為至論也夫士之心術其變甚微其所繫甚大邪正亂于下則取舍惑于上天下國家治亂盛衰之勢實關焉古之人推其寬大樂易之美意以開天下忠信

誠慤之良心與之相求于風化之所及而相信于形迹
之表科目則未之聞焉耕釣漁鹽之夫誰其舉之而加
諸上位南畝耕耘之士誰其試之而烝于曾孫來止之
頃豈非三代風俗敦厚忠信誠慤之心不離于天下故
其意向交孚莫或猜貳人才之盛隨取隨足而遲疑之
念不置于其間後世人主習聞三代賓興掄選之詳而
失其本意之所在于是自漢至唐科目繁興而士益以
不如古曾不知科目法也意存于法之外則天下之士

不惟自信其所學上之人亦有以信其下一以相繩士始不信其心而上之人又日疑其挾欺以求合吾之法矣嗚呼秦皇漢武以法繩其民民猶望望然去其君以基禍于天下今其人曰士而獨以法取之則邪正之雜糅賢不肖之混殽使上之人公受其欺而私病其乏才者亦患之所必至也至是而後知科目之設固以壞學者之心術而取士之弊者當參夫心術之正不正而竊慮夫變法易政者祇以益其疾耳雖然後世之學者其


心術甚易正也亦甚難正也何謂易蓋昔者異端邪說迭出于天下以聖賢之言行汲汲皇皇詔告學者而莫之辨自董仲舒韓愈王通諸君子相望于數年之間而淫辭怪行不得並行于天下諸百家不得怡顏於六經之側非聖人之書曾不得近學者之耳目而闢學者之念慮于此時而欲正人心術誠為易耳奈何利祿之餌垂于場屋標目之揭多于有司高者以其道可侔伊呂卑者以文辭俊雅名之天下之士爭先投牒聒然皆有

不自安之意廉耻之風掃地無有然則士之心術自唐
以來誠不易正也肆我國家取士之制大有古意設科
之名悉倣唐舊每歲貢舉畧為三年詞賦經義之外不
為多端以責士子此其微旨固已見於科目之病夫人
也惟夫三綱五常之道本原於人主之家法忠信誠慤
之習表儀于朝廷之公卿大夫文之以禮樂養之以學
校凡所以動盪人心而正其趨者無一闕焉厚其心術
以養于平日時出科舉而收用之三代遺意蓋在是矣

乃者適臣有請欲別為兩科歲舉士子而隸之學其所
舉之人則屬之卿大夫士與其耆老之可信者是蓋深
病夫士之藝實漸廢而求所以革士之弊也愚嘗以今
天下之士風察之竊以為今之取士不在科目之未嚴
而在乎心術之未正焉耳今天下士風何若哉賢者有
所避而求晦其所得不肖者為無忌而虛偽亂真其修
之身行之家者未必非佛老寂滅之說而筆之于紙者
無一辭焉其發于心害于政者未必非管商拊克之事

而形于牋記者無一畫焉上下習熟肆為欺詐而莫之
怪凡此者皆其規規然求合于科目之舊習也心術之
論愚安敢自廢其說于人才未用之日哉大抵人之情
常怵迫于法制之微文而潛轉于廉恥之公議今天下
之士學于師友而希進于學校貢舉者彬彬然三歲大
比持聲病剽竊之文偶中程度則求官選部如責償然
雖文彩華如張昌齡者不之問也學校養士飲食起居
之際苟能循循默默以消白日者皆得以行藝著名於

籍求其講明有用之學如胡安定教養之法者又未之見也執事誠採擇名望不專文藝以革貢舉之浮薄招進諸生誨之館下以漸廢學校具文之末習益自修飭誠意正心之大學而不徒事于區區科目之文數年之後其士風近古十年之後鄉大夫必有可深信者兩科之設其在此時乎惟執事次第圖之毋亟



欽定四庫全書

集部

九華集卷十四

詳校官庶吉士_臣初喬齡

主事_臣呂雲棟覆勘

謄錄監生_臣嵇承羣

謄錄貢生_臣吳壽康

欽定四庫全書

九華集卷十二

宋 員興宗 撰

書

與諫議殿院書

某不佞本有志聖賢之學而托諸深山家貧困餓是以
在此亦欲遂充其學以報吾君此其素所蓄積也故聞
天下有學古忠篤之士則必皇皇而求之求之既得則
必熟復而觀之其皆是也然後退焉而無憾况今天子

所寄耳目之官非學古忠篤者能之乎側聞諫議殿院之風學而有守議精而不流四方稱焉故陛下用二公於篤老之餘而處之以百官之劇豈非亦欲望四方之所以望二公者耶此者聞二公既外其身以報陛下如辨歸正之士至於一至於再可謂不負所職矣然今有大可疑者衆舌嘈嘈喧不得止僕而終不言歟是外乎君子也言之不正歟是欺乎君子也夫欺君子而外之衆人不為而僕忍為之乎故敢為二公一吐之其事之

有無雖未審詳即使有之亦甚可懼也蓋昔曾覲龍淵
之用事天下謂之曾龍而不名方其盛也搢紳奔走顛
倒衣裳未貴者倚以為資既貴者託以為重宰相不知
非禁路不知詰輦御之側器聲沸騰雖晝鳴鴉而市列
虎莫駭於此者矣佞媚之極下上一律故時人以為寧
觸中書無忤二父者可見其權勢之烈也賴天之道陛
下之明分北而居之一則以死而一則以衰今者不知
何人謂覲復有入都之命遠邇張皇不免震懼蓋昔張

放驕溢欲留京師而薛宣不可僧直佞幸欲雜士風而
江敎不聽豈堂堂天朝獨無宣教之臣乎况吾二公見
司國憲者哉或曰是曹有勞奔走於潛邸陛下非忘勞
之主也非惟終赦之亦終用之耳不然則是少恩是不
知陛下以天下為家不以一己為私使是曹信有奔走
之勞曷不以金帛厚之以名字寵之乎奈何必授之柄
以疑撓海內哉彼兩人者前日襲權勢露恩私朝廷每
下一令用一士則必唱言於外曰是將非我無以為也

此於古法當誅陛下幸赦不誅矣昔太祖世軍校史珪始見信用其後肆威作福遂一斥不振陛下今日待覲之法不有太祖成法乎二公何疑焉此事既著凡在官者當面諭之屬以不肖人微位下近申明歸正之士未見俯從今茲喋喋則又似舉一毫以搖泰山也退思今為陛下所重者莫過臺諫羣臣取正者亦莫過臺諫臺諫謂可留天下必感臺諫謂不可天下必豫可否在二公之一言二公何忍遂終不吐口乎深恐羣邪之萌渝

滄訛訛階此復振未可知也伏惟即日興念啟之辨之
率善類而拯之無不宜者請受命

上虞丞相書

敬聞外論浩然歸重邇日力挽同列之舉一以示協恭
之意二若捨是翁則他人益可慮未必更有純篤者三
上前同議大事若體理未安兩人尚可執論回天意彼
去則上必盡畀先生以難繼之事孤介爭之則愈難不
爭則羣謗必興今如此區處之甚善甚善外論盡云即

日順動此無他蓋見朝廷近日稍稍諸將起廢及建節還節等事此事何預順動而外言乃爾度必有諸人伺聽於門下者今從庸衆之言則多玩弛從裨闔之論則必生事二者咸不可用蓋今日之事當作一意守之爭於上前亦只一意何謂一意順動不可一日先備禦不可一日後是也伏乞鈞意再三深惟之外論近日宰執爭權貨務關子會子事胥卧不出此事雖草草然是人畧有虛名前日與子淵說先生畧加曲折甚善見說皆

一二販者作之使然况關子會子利害卓然若歸朝廷則版曹平日為無策前後手足俱露萬一有緩急則誰受其害者此與臨卽鹽關子大意畧同况諸司告病已久乎外論王天覺林井等事甚喧或云朝廷皆有以賓禮之此法不可長也若果是諸葛張兵必不先畫陣圖從邪徑見說諫議已具姓字面奏不可不知也願再三審諦之外論甚渴王泉州之來今聞移信守豈欲為之漸耶日已薄矣先生孤子無助之狀如前得張嚴州之

書甚以為憂也

與黎守馮縉雲當可書

某再拜某少駕緩自度無以力於他技所以求輝今傳後者獨惟文字然心之所向者衆所棄也故文日蓄而名日晦道愈積而謗愈衆最後得一第於奔走惠苦之間衆則曰某於筆墨第有聞矣材士也不知先民之所自立能浚源而導根者用此與否是以踧踖退而深悲其道與夫今世之士行溺於俗而文聒於時是誠不

足與深處假余處之而久久遂化則將并喪余之有使
余悲也如是者思之有年因觀乎聖賢自得之域則每
至於自處而自嗟幸也側聞閤下之風而猶有以起我
其文高以宏其氣浩以潔世愈相濁而公愈相違蘄合
乎古人而步武之是閤下之道誠有感發乎吾之中盛
矣吾道之不衰也不有倡焉則有繼焉無忘其倡無怠
其繼余其可以無動心於此乎凡世俗厭棄而不樂者
閤下既有以深樂之吾必將有以樂之也衆作徇外而

不已者閣下獨有以已之吾亦將有以已之也知之則易
革之則難耳嚮於丙子之冬見公於磧上有言而不究
前此又值公於道周欲語而不暇惘惘注視若深念予
者豈亦有取於寂寞者之言乎今輒哀近作數篇求教
左右此皆因時之言雖不能形心之微然亦可見其志
道之髣髴也伏惟幸察

再答縉雲書

某再拜某不佞念慮鄙外自度無由合於君子之門而

執事乃貶抑情文獎許過盛待之以庸衆之所不能約之以古義之所必至意謂足以振斯文假若先民抱負者之當此也猶然再拜云云以避而況於僕也哉蓋道德之源注而流也世必有任而興之者任之乃人而興之乃天與人相因而其誠篤其慮微不言則無以為教彼書言之未立也吾與茲人並生而食也並息而作也茲人之惑而甚至於無知而吾之書言廼與天地並其道其教實尊且嚴如此君子矻矻造道一日足已而

致乎且若是者其難乎其易耶如之何而忽之不幸世
無孔顏而此道日隱荀孟之故志世尚不知祖之間有
祖之者則世更非且笑之矣以為是不可繼而人欲繼
之非誇則誣吾不知先民之初能復性以立我者其始
異我乎否也今執事之書以為窮居弔影之日久寂寞
無所事則棲心於簡冊求孔孟之所以自為與誨人者
甚矣閤下之心誠有類乎先民之心此某用是不以蘄
一世者蘄足下且因以足下之自勉者而勉職也昔韓

愈子可著書而不肯著必欲俟五六十而為之其後五六十而書乃成幸也愈粗言之而世傳之其不言而可憾至今者吾不知有幾終未若有書之完且好也聞丐官祠甚善甚善公能有言而世終有言吾願與二三子鼓公之旁而張公之軍也所謂二千石者能為馮公榮耶願幸無忽

答漢州教授程用之書

某久困塵間未盡見當世作者極其至求之非好古篤

道以聖賢自責未必有此豪傑也雨霖矣頭風滲滲連
三日念一見不能也公能不以疏數責我乎得教墨清
風俱來披之不盡尺幅皆簡遠具思致寂寞之音近世
不言矣非惟不言且諱之也入之者雜仍之者流其皆
然也其又何誅然吾道我立聖賢我師是不可不勉也
力之則是即之則至矣願用之勉之僕前開口輒以論
著者以是自決耳信不信皆不計也自盡自質於聖賢
耳矣僕生年四十餘俯仰西南求如公為友者今才一

二自一而二自二而三僕以古道望此世僕豈狹矣乎
某白

上王太博書

先生知人之情乎人之情與其輕信人邪寧其自信也
所信在內不在外則無往而不自信天下固有明智者
非遇天下之明智不合也故君子之道未明則不輕於
自信既信則不輕以告人此僕所以默默於當世而未
嘗有言也然嘗竊窺湖海千萬士如先生之明智者巍

乎其至斯於篤老之士必能內信而自合不俟僕求信而輕合也是以屢欲言而重發之以俟乎君子之自信自合也先生願聽之夫某決非好異者也其心蓋大欲矯拂近世之學使漸希於聖賢之域僕誠有守乎爾也蓋世實資道道者經世者也文者載道者也誠者達詞者也學者尚誠者也志者敦學者也而近世進士者之學皆競乎媮墮渙忍藻績之言可謂流俗而不返矣志輕故學流流則易廢識冗故詞雜雜則易散文鬱故道

卑卑則易晦所謂無其志者無其本也無其道者無其終也其本不立其終不明近世咸以是自鳴而爾雅之詞於是乎實衰其在上也不以救其在下也不以悲此愚之所以忽忽深恨聖賢之遺於古書不敢自棄且自畫也世俗矻矻不可變如此非求天下明智誰訴之而誰列之哉恭惟某官志大而語周明言竭論碩厚俊偉常見推於朝廷而先於諸老矣今猶以為未也淵然而思惟其古之求條然而辨惟其學之明邇者某蓋嘗以

樸素迂遠之才列於君子之前判乎其若自合也豈非
明古道處今世近時所以不取者先生猶有以取之歟
今行李刼刼於外大懼無以稱門下恩惠之意退哀所
為文得古論古傳贊道編共三軸猶有近作不盡精純
之意欲急求通於君子是以不敢自後者若夫寂寞之
音簡古之義史遷韓愈之趣有若能紹明之者請繼今
以陳

答洪丞相問隸碑書

某齋沐再拜判府丞相大觀文先生邇者伏奉鈞教忘其不肖咨以川蜀兩漢碑墨之所從出及古文奇字至於種種旨意諄復被教之初伏念旬時至於今茲既月乃日矣非不能答懼不能詳也不詳則遂虛大君子之誨是以臨發輒已發則不敢不謹也敬再拜以對恭惟丞相於時為通儒於名位為獨絕於經誼則闕而深於史學則博而嚴於箋傳集類兵家歷法農工國記星官醫藥之書與夫釋老異家之所傳授經目則無所不考

考則無所不詳今則擁百城坐大鎮自公之暇尚恐日月之易窮念詆刻謬書之病耳目且欲一而新之也則又取周秦以來聖賢英烈魁雄之士名世者彞章鬲畫鼎篆分隸之文荒林遠野祠饒冢刻之寶約其義而點其衰剖其原而博其趣題端跋後解蔽徹疑丞相衛道博古可謂篤也已矣近世所無有也然丞相所以下詢數十條者文有主字有體意各有出謹先具其知者畧其不知者蓋不敢以不知為知是不欺於門下也竊觀

廣漢巴郡蜀郡漢中益州犍為皆漢故郡也。郡所發之碑皆漢故物也。自巴郡太守張納功德叙故在巴郡。巴今利州路也。然漢之巴郡則在夔之忠州。張飛客嚴顏嘗為巴郡太守。乃夔之巴郡。爾似與張納少異也。今當以漢之巴郡為正。有廣漢蜀國李翊碑。在今渠州。屬郡屬國李夫人碑。亦在今渠州。觀此二碑。疑若夫婦也。然一云廣漢屬國。又一云蜀國都尉夫人。其名位俱不同矣。近得廣漢屬國侯夫人碑。侯音候。字從侯。漢有衛侯。

北軍中候是也。從省文耳。此真翊妻耳。但不知丞相所收所謂都尉李夫人者。與此少異乎。若其無異。則為翊妻明矣。自司隸校尉楊厥開石門碑。武都太守季翕折里橋。郾閣銘石門者。興元旱山之東也。今厥碑在褒城斜谷。前人亦謂之褒谷。蜀使五丁開道是谷矣。折里橋。郾閣銘在利州西路。興州趨武道上。武都。漢白馬氏之地。今階州即武都也。碑立於波夷江對。至今猶儼然。漢之已郡。乃今忠峽之地。而巴郡太守樊敏碑乃在西路。

雅之石馬益州乃今犍為瀘叙之地而益州刺史高頤
碑乃在雅之巖道永元磨崖碑雖在嘉之夾江有字無
志猶唐蒙入蜀碑雖亦嘉之龍渡今有額無碑也如此
可憾者甚衆斯不可以筆舌盡矣丞相所詢之碑凡二
十有五今所知者凡十有六大都見於別錄不知者凡
九丞相所未及詢者又有五焉東漢為將軍碑在巖渠
碑字為衆隸之冠蜀之先達皆咨其法焉建武何君碑
近世鋤墓者得之比衆碑為最在雅之巖道又得大夫

碑大夫者褒也在今資州資陽縣聞好事者竊去矣黃龍
甘露碑隸法可觀碑亦稱之眉州故石也一二大家能
有之去而不出是必不凡矣劔州梓潼道上有雙闕或
云孝廉闕或云使君闕高二十尺有咫比王稚子表者
為壯大夫士過則必式信其古也此五者丞相宜有以
咨焉不得則有以求焉可也今先以數種呈納昔王回
深父常集故蹟遺文曰物莫壽於金石金石誠壽矣然
猶不足以保其外予嘗閱古鐘鼎舊家碑碣之文以證

諸史及他傳記褒頌功德雖不可盡信而於年月名氏山川風俗與其一時文采雅度有得其詳而史傳追述乃其概耳曩所聞者磨滅殆盡今所聞者後數百年又磨滅者幾何也故采其備者首尾以編之彼深父刼刼有意於古至於拂性苦形收拾亂墜守之以勇而求之以不止自金石而詮為信書宜其學之充博也是以歐陽子咨之以集古之半訪之以娑羅鼓之異事質之以汝陰顏氏之遺蹟蘇子容叩之以表三老之故碑而宋

次道呂縉叔原父子原叔之徒望風屏氣直不敢與之
抗也稽古之功其可泯乎且回以一士稽參散逸猶能
傳當時而信後世況以相國大臣窮研廣索科條畢理
稠重畢去斯亦可以左磨史蔡右悉鍾張矣誠集古編
所謂有力而好好而至者近世之所無有也丞相既有
之矣又篇末有曰請益之詞且君子有道有位位有窮
卑而道有精粗得道之至者識通以明是以天下求用
不匱故名位一切不施乎此自非然者上下之分安可

亂也丞相今畧名徇道於是至矣然某非求用不匱者也傳曰借聽於聾求道於盲聾盲何有而君子乃求借之乎然盛意不可以虛辱念終不言則愧且無日矣丞相之所引若隸碑之堯祠請雨碑所謂鮑所謂二九之戒所謂名曰咸池之歲所謂禕隋在公之字所謂兼齒雅之說所謂闕幘所謂年壽所謂五六六七訓導若神之義蓋漢之士習漢之故去先王為未久也宗廟朝廷之間大羹之敦玄酒之尚疏越之音風氣淳厯是以出

言有稽皆無章句以破壞其體則宜其字語之可觀也
其轉象旁訓若異而實同不可不察淮南訓鮪魚為異
魚集韻亦以為然魚從尤乃古義也碑云二九之戒蓋
年數也張平子東京賦玄謀設而陰行合二九而成譎
宜其戒也薛綜注曰元成也謂王莽之謀陰行十八年
故曰二九也然則是隸其在建武永平之後舊碑載歲
在戊午名曰咸池一也而名則有四以星名者司馬天
官書咸池曰天五潢晉志咸池曰魚圍是也有以地名

者劉安曰日入暘谷咸池是也有以樂名者莊子皇帝
奏咸池是也有以歲名者淮南天文訓大時者咸池也
咸池為太歲今碑云歲在午曰咸池其淮南所謂大時
者乎碑云禕隋在公取詩委施委施退食自公之義也
不曰委施而曰禕隋乃韓詩內傳解直禕隋三蒼注云
行步依動貌也漢字通訓蓋千百矣如解后不害為避
逅之類禕隋豈害為委施者乎牟壽者眉壽也齒雅者齒牙
也儀禮凡紀眉作牟禮記引君牙作雅然則隸文為兼究齒雅

永享年壽者年為眉雅為牙其義可決矣凡幘履後巾也東漢志云耳宜闕幘為傳講之巾也至若咀嚼七經五六六七訓導若神之義非吾夫子不可當也五六者三十六七者四十二也豈非謂七十二子乎書五六六七之云猶左氏謂二五之偶漢書謂四七之將碑從度辭所以為法也先儒曰六籍熄於戰國焚於秦逮於後世學士不見中間之信說而欲特立一家之學者果自能哉吾未之見也借是而論則稽事博者其要必正用

功深者其傳必遠凡取信於史傳之錄者舉未必真今
吾得之千載之藏碑樹冢刻之間則無不真是誠可信
者也且以唐逮今未能五百餘歲若依載傳考之則年
位歲次名氏圖牒山川風域成敗之由叅錯不齊若十
指然况唐以前其失可名也哉是則碑不可以不徵傳
不可以不信也某近述史考差失近數千條是皆史氏
口傳耳剽一取小家浮剝之失病至於是而何有於本
事然則丞相徵碑之功下詰衆史猶羣星之一月矣其

盛甚盛丞相於道學史法兩見其備味衆人之不味其
功卓矣此門下若不肖所以欲附名於言端而托諸不
朽也詩云跂予望之傳曰伊其稽首不其有來乎度旦
夕裝治復歸大庭敢致稽首有來之願而伸跂予望之
之心獲卒所聞於前斯又大幸也尺札奚宣所悃哉惟
丞相所以察不備

上都大書

竊觀近世外司庶府辟召賓客雖有古之禮而無其法

有其法而無其意至於比年則禮法意俱漸衰矣此無
他求之者名未甚優而應其求者實有不副故也古者
賓主之相值甚貴而不驕甚賤而不諂奔走不憚而慕
義無窮豈為勢利回哉雖區區之唐諸道幕府溫造以
處士來石洪以山人顯未嘗聞曰某資未入而某格未
合也故唐末辟召之禮與其法意猶雍容可覩不若今
時漫漶紛沓而俱亡也諸路帥臣監司之客不惟人品
之論而惟資格之拘不然則以勢却者也不然則以利

傾者也不然則親舊桑梓之私者也其有卓然才行溫
實主者欲首薦而不得則輒拘資格乃止故曰辟名之
禮與法意漸衰於此耳今先生特立獨行所以自為者
皆前修之典刑進退不依乎勢卷舒不襲乎時是以雖
某之不肖一旦獲受知列於門下使某名字暴於蜀而
不愧者知先生有以取之皆非取之近世資格勢利者
也凡古之辟名禮法意三者已粲然而陳前矣在上者
養待之甚優在下者名實之不副某夙夜無以處此邇

者又蒙許貢以辟書而達之二府則是荒唐寂寞之音
收錄於變雖未必能中韶濩而已可一警世之瞶瞶者
矣豈非某之幸而亦蜀士者之勸也伏惟幸察

欽定四庫全書

九華集卷十三

宋 員興宗 撰

書

上執政書

某旬日不得瞻見正以病餘不任奔走連日見欽夫一再相會因及時事衮衮無有不同者彼來自閒居其間見廣以確其心虛以靜其說詳以密一一得藥時病之意既退自喜以丞相先生薦進為人大君子每務舉用

如此更益求其比則善類或有益簪之理而事功或有
植立之象昨日聞其朝辭為之悵然此於欽夫自為謀
則善於大臣謀國達人之方未安也今日又得魏元禮
書以為此公學有本原識大體若東閣留其從容所補
多矣蓋一士子之進退同類因之亦以卜己之進退已
之進退天下之休戚也安可不慮相公平日一意王室
惡人避嫌惡人選懦默默今當反復思之豈其中自己
得九重之決語乎外人不得而知愚不肖亦不與知也

不然安可不辨外間但見近日王泉州杳然無名用之
耗悠悠善類無所終薄不免疑懼某等負壅蔽大君子
之責固不足恤所深恤者相公之相業當先此也聞之
君子曰大人無我則無累凡以外物累心謂之私已私
已者有我者也近世大臣大率私已每事不權社稷之
利害先探君上之好惡此固有進退升沉之機把持其
心矣是中安得虛而明乎非虛非明念欲分邪正畏謗
即止邪正安得而分欲釐弊蠹拘制即止弊蠹安從而

去日夜不過嘆息遑迫視屋竊憂而已甚者事拂衆志撓四海必諉曰上意未回耳非我也姑少安之安之則後猶可為後竟不得為未可知也賢者多棄散地聞者切齒視者腐心彼又諉曰吾非不欲用某進某上弗可耳後日用之未晚也已而竟不果用未可知也此皆近世氣習之陋得固寵之私心而喪忠君之大節者也願相公急返此弊以塞天下之望且以管子之相齊猶以求賢不廣不用不終為害霸不寓內政不盡已所為則

不止安有堂堂萬乘之相不得為管子事乎今元禮之言又曰次輔爰立亦既數月未有慰人心者天下於此皆紛紛矣相公見人甚衆如此等言求之南公之中真諤諤之友也彼所謂亦既數月而未有稱者丞相可不懼乎思懼之大以弊不去賢不薦也丞相借曰吾力未充更當引日迺可昔杜祁公衍相仁宗凡百日去位其施設可考天下至今誦焉彼在相位百日豈亦以引日為解乎丞相宜殫吐握之勞悉薦進之力則詆議猶

可及止也或謂泉州近日已加職名不為不薦其他善類將以次收用某謂泉州先加職名者迺所以啓天下之疑也昔狄仁傑薦張柬之雖老宜急用武后以為雍州長史仁傑爭曰臣薦柬之宰相非薦長史也其後卒相唐不知今日丞相之進泉州將大用之以利吾國乎抑特加之職名以利其身乎如是而為之策末矣況今羣小用事主聽不一內外訐沸曾覲去而又來安知無投閒之論王朴賤而暴貴慮亦失歸正之心三衙有勇

而驚無罪而斥則何以使人輔郡有苛而察無時而暴則何以信衆至其他含糊背理以蔽虧日月之明者不可勝舉伊尹曰一夫不獲若已推而納之溝中今郡城內外怨嗟愁感起不平之憤甚衆則同志濟時治國之士丞相其可不急援之乎某今日送欽夫不獲侍言於左右敢達元禮之詞併以書布之伏惟幸察

答太學學錄梭山陸子壽書

某辱來字為愛甚具何敢默乎爾也聞之夫子曰道不

遠人人之為道而遠人不可以為道故道也者吾固有之也吾能始之能終之斯為道矣然則君子之得之也如之何其始如之何其終也必有志焉不流之謂矣必有學焉不怠之謂矣必有識焉不雜之謂矣三者之一於內也奚往而不一也志之所一學斯一焉學之所一識斯一焉識之一則君子無病焉爾矣充之而動動則明明則智智則聖率以是而沛乎詞伸乎志而載乎道者也異端云乎哉章句云乎哉昔孔孟共由者由此者

也漢已來亡之矣有曰況者曰雄者曰愈者身之矣斯
近之也卒不至焉斯病之也亦曰志焉時流學焉時怠
識焉時雜也是則諸子已矣其可臆也僕也又出乎千
載之後而起諸深山而談寂寞之道而出九華辨言之
文其譏評信否其庸自幾免乎不亦樂乎吾黨之共樂
也樂之在我者也今也有聽不聽後也有傳不傳吾何
損益之有焉此公所以欲共樂此樂也子壽所云諸皆
是已獨曰未敢有意於文而甚好其道斯道也好之篤

則言之章矣文不外斯也退之所謂未聞響大而聲微也公其懋焉

答甥費判院恭用書

某再啓吾甥書辭之意勤勤甚矣吾甥之能有立也其致詳熟復盡所慕則古所畧則名以仍世父子之所以待我如我之所以自待不謂之知我其可乎夫君子不自欺則不息不息則無不誠韓子曰誠者不欺之名也故在衆者我之所不能惑在我者衆之所不能易不惑

於外不薄於質是之謂不欺惑於外則情勝矣薄於質則文勝矣以是為道則道且蠹以是為言則言且末然則所謂誠者其可易之哉豈欺也哉吾甥知性之學何往不裕今欲一於誠則無徇外無眩辭庶幾臻乎其至也來書謂邵子能誠其心故能發諸先天之學先天後天之學世固有其人矣某固不敢議邵子者以其簡乎情而篤乎內先乎質而後乎文者也以是所為邵子也近世學易者例曰我知言我盡數不識其果能不欺否

乎傳曰君子心小而道大若浪為之言夸為之名是心大而道轉小矣今吾甥之不易言者乃是也切慮切慮若某之學之年皆未可以預乎易也自今至於後日可以不競不流充其不欺之實而已矣吾甥苟以為是願相與力此勿怠

與興化林文謙之書

某再拜自尊旆南歸且數欲具書候動止都城役役竟不暇裕然度友丈既中有以相親與所以相期是必不

以書之疎數為間也負甚愧甚隆暑在候尊履即日敬
惟萬福某不自量力欲求古聖賢之道植立大中之意
於世故頽靡波流之後雖以多病多難輒不自已始則
學焉以充其性久則性焉以復其宗既又皇焉以求於
天下將以共吾之樂而樂吾之有益不敢以須臾捨也
如是每一意焉斯久矣向猶未之得也不謂萬里迺見
如公者孜孜矻矻推原經事散逸傳注離異不綱之意
求粹其理豐其本甚盛甚盛雖然以愚不肖素處下國

既僻且嬾而其從事此道亦專且久凡其虛緣寂處日思孟軻以上聖者賢者詩書愈窮愈有雄況而下有書矣愈即愈病是窮古人之所已得與夫得之而未至而後思吾之所當得者於吾浩然不餒之實孰薄孰厚氣形於心心形於言孰至孰不至吾皆可得而察也前此既辱遇顧為出所次九華書者與老兄觀之倉卒不能畢且退又懼乎不醇也靜理年餘日加剖擊今則粗趣乎醇矣於兄不當自隱也且夫天之有斯道也故當公

之於傳道者人得之則人傳之矣身非取人而後動口
非取人而後言道非取人而後致也亦曰勉焉得之則
得之也世果喪道矣乎由是觀之思而未至雖雄況言
而或失可也思而至雖塗之人無失可也此不肖於此
書所以無讓也更旬日後淨手錄呈千萬為詳復之有
病焉者必告我僕非既其文求既其實也文中子想已
摘出僕之書亦粗指出其本文竄去其附益剽入之陋
如解繫緩轡而驥之德力見矣老兄以為如何切便見

教吾人枯槁汨沒又相與談寂寞之音想為世笑矣勿
廣勿廣

代人上李制帥書

蓋聞君子有以高天下則天下之人推其高君子何能
高人能服人也昔漢廷臣尚辯劉寬不辯漢廷臣尚爭
劉寬不爭其不辯不爭非不勝也度量寄焉耳此寬所
以為寬也昔晉諸公進趨者紛然獨謝安恬然議戰者
戚然獨謝安怡然夫安之恬然怡然非徒然也清淨在

焉耳此安之所以為安也故二公之有以服人人服之
其度也其靜也率服人之具也此僕所謂君子非徒高
人必有以服人其是之謂歟恭惟制置密學先生老於
道德而際於名理雖翹然處暴黜之間而不爭游談還
至而不辯此以度量高天下天下推高者也撫摩蜀人
蜀人既休之且安之下載清淨非他也以靜服人也夫
公之於人以靜勝以度勝嚮也漢之劉晉之謝比公其
小哉此兩蜀之士皆裹糧而見公處公清靜之淵而仰

公度量之海者也僕亦願游淵海之一者夫士非徒求進非徒不進也有大賢而依之何由而不進况僕今之進異乎衆進哉蓋昔先丞相之知人知莫如公僚友之可畏畏莫如公文誼之可友友莫如公夫丞相知之也畏之也友之也皆莫如公此宜僕有求於公也況邇者天假之便獲處公之幕哉此僕慶幸當何如也昔嵇叔夜以身徇國其終也執子紹之手曰巨源在汝不孤矣是以其子託故人者也今先丞相之殉國類於叔夜公

之賢過於巨源而僕之才遠愧於紹以不孤望公者亦
巨源之故也況僕有華顛七十之親聚族百指之養宜
賜憐隱望望不宣

答張南軒書

某上覆近別英緒乃情惘惘蓋自去冬一病不振牽連
三月亦以為久矣初強起隨俗應酬又苦寒嗽四幹疲
殆既又旬餘賤累來自天西又強作支梧志意鬱鬱然
終不聊賴如人家布席燈燼火滅酒殘歌廢而或有一

客突入牽挽主人強飲仍欲布席如初如此於人情為樂為願否乎此僕今日留此之勢也妻子既赤手南來僕又刼刼未能赤手將之以去萬有顧戀則目前顛踣之議危苦之勢黨同伐異之私度非一士橫身可任況僕寒遠莫先者乎尊兄心期必相憐念昔之賢有希贈言者必曰何以藥我何以處我此僕晝夜不無望於尊兄若其書之疎數問之勤怠叢細之語尊兄必不推求於踵武之內也近見所貽子霖書似薄怪僕者不知方

寸之中艱難薰心抑鬱而無誰語也尊兄必矜照此情
當窮研於迹外也僕尚何辭然不敢獨外吾兄亦精言
之於此今天下所望莫過兩相其實皆君子之質左相
既為客所誤而心漸蔽右相又為勢所怯而志漸疎誠
能充本於遠大則客所誤者可以錯枉而舉直勢所怯
者可以外身而勇奮天下事尚或可望也然以私料之
客所誤則私黨愈熾而公論愈衰平日市聲名於世者
植志傾惡公吐正論而潛結近習唱言誠明而身為墨

賊依阿於此以和附之潛起蠹害善良之心前日元履
俯首受斥以歸今獨餘僕岌岌於是其又能行所信矣
乎僕告右丞相所以脫去藩身固志之說而相君以為
升沉有定命切安於中勿為外事侵亂僕平日粗學道
者豈不明知此理聖賢心情當憂勤之地未嘗不安静
日入静境未嘗忘憂勤莊子曰天德而出寧是天德者
皆備於我我遵而直之敬而復之所在而治則所在而
静也故行富貴行患難皆吾有以出寧之德德者由理

而已矣但今日事極險惡非特忌者滿前而讎嫉之積如山誠可畏也前日見丞相言將有所振舉宜及時順動未可遽興兵以傷財之說再三論之丞相亦俯首稱善相期兄以金石之固共功業於晚日矻矻說之不去口願更為之精加思慮耳陳邦彥未作諫官日每言必相欽重見聽其意以今日善類不多為念也既在言責似相疎此亦似為平日負虛名而身墨賊者誤之也尊兄切勿泄此語令僕立受奇禍蓋老兄前日譏其赴鄰

家席至今相尤不已隣家既去渠輩亦無悛容又陰轉而之他非墨賊謂何前日魏元履上書說其暗主曾覲今覲既來諸公了無一言然朝廷必欲區處邦彥豈得為過乎此由魁然在上者好墨賊有以陰悞諸公也近芮國器數往還端靜而介朝家獨可保者此一人也但未知其心深能辨邪正與否交道誠難不得不日相磨淬也陳叔進亦佳但恐其膽力差弱自了一已無過失也鄭儀曹李秀叔亦只無過者其他更未易數耳知人

誠難事丞相近已奉詔馳出門其大意亦以任巨責重
為憂欲以微罪行不然千鈞之弩何為鸚鵡發機哉僕
近日與子霖言丞相一事似丞相終見未透古雖有任
賢使能之說然吾儒涵浸充積得到四時自行萬物自
生豈有執戈矛馳逞自與甲兵縱橫者便為知兵輕裘
緩帶沉粹靜慮者便為不知儒者可以一發名哉列國
以下其後如諸葛王猛崔浩裴度竟何物也司人物者
但當看其才氣卓識如何爾語曰文武之道未墜在人

孔門何嘗分文武來果若分二塗便與晚唐陋儒氣象
一種分文宣王為一廟武成王為一廟孔子不知兵則
夾谷之事當借諸侯客子應之可也此事當細思兄因
書為丞相言之且令親近當世卓識曉透大體一二儒
者為宗其餘才則以次用之兄其可安視丞相而不自
奮以至名實俱亡也哉願無聽於浮說適更有所欲言
紙窮筆倦頭亦昏三嘆而已容後訊也

上執政書

某竊議南北通好其事有故其使命儀制亦有故昨日
北使奉命乘軒而入非故事也不引他疾而先引足疾
非懷黠計欲陰啓不拜之漸乎萬一九賓在廷或致倨
肆作跛倚之狀朝廷何以制之事關國體少有蹉跌傳
笑四方何可忽也謂宜今日先施伐謀之策令理體得
安昔契丹使蕭英來聘仁宗以富弼接伴上遣使慰勞
英稱足疾不拜弼曰弼嘗使北疾卧車中聞命起拜今
君聞天子之命乃敢不拜耶英惕然起使人掖拜萬一

斯人起蕭英之意則富公之語正可施也況彼以閃動
為詞又非沉痾其不宜掖拜明矣其次若寬賜之告日
有勞問仍獨引其副使之成禮且白上明降指揮云俟
卿足疾安日引見如是則其謀塞其膽破矣是不動聲
氣而得上策昔西夏遣使請事請粟於朝呂夷簡以意
折之彼亦後悔乃曰不合如此朝廷有人願先生與左
丞相試精詳之無使此使潛計得施輒萌朝廷無人之
嘆焉今日傳者以為是人之來語不妄發目不忤視蓋

語不妄者必其慮固目不忤者必其謀深如此則彼非
來使吾國乃覘吾國也待之可無重詳乎某正病中不
能走謁又方啜粥謹力疾具稟伏惟以社稷經意而深
圖之

上丞相議置發運書

某竊聞朝廷得旨更置江淮諸道發運使外議既不能
深曉已半疑惑又欲以史正志者為之愚不肖不知其
所自來但見其前後奸欺罔上無畏始談攻守迄無一

成請置水軍徒為百費聽其言則虛譎日進詰其事則

誕妄日彰居常軒軒視正人如寇讎

王龜齡

指老成為兒

戲

張魏公

若此異類長惡不悛積其宿姦愚弄國事自合

為大膺誅戮小禦魑魅者也丞相諸公前日每患臺諫
不知大體今日乃使小人欺蔽九重畧無忌憚幸而諫
臣首發其事彼非深知諫體不能爾也然彼已三言而
伎倆窮紳笏萬口而惡言播丞相諸公為聞為不聞乎
不幸大論竟亦不從則正士去亦不久善類率以此為

去就天下四顧而責將誰責也丞相必能處此矣且陛下命正志為蜀帥正志捍抗不行又懼其罪也則多方以求免求之未得也則談利以迷蹤叛命慢官莫甚於此昔唐太宗命盧祖尚守幽州祖尚不行太宗曰朕何以使人斬之廟堂不知正志今日之辭蜀有異祖尚之辭幽州乎一從其言遂墮其計又秦國紀甚可惜也況今日財物憔悴繫生人之命歲月取捨繫治亂之原正志欲脫一行乃復鼓舌妄發且學識如王安石一妄更

張遺禍至今況是小子至庸無識者乎此物情所共駭者也某待罪三館於一小人去留似亦無與然使國家無故而忽諫臣無事而委命令於不義可得默乎前日王天覺以市井無賴蠹惑衆聽以污清朝聖上覺悟去不容髮今不閱月正志又前旬日之間訓注相接此何理也願丞相諸公審處焉夫廟堂者納君於無過而臺諫者正君於微過是或一道今不韋臺諫以言事去於義得矣丞相諸公乃曰臺諫言不行而去亦其常也假

設成王或有過周召乃謂此史佚之責非我責可乎二
三公何以處之伏望丞相與元台參政持是以審訂之
若乃以僕為狂為愚不合公議者亦併逐之若其不逐
即留門下之辱是終玷丞相知人之明罪愈甚焉敬俟
命

上轉運陳度書

某頓首比暑歊寢隆想燕居有宜弊邑蠶成麥登所收
十八勞民少息粗無流亡非使臺善化其孰致然老夫

蒙幸甚深知免於戾前沐示諭故不涉便文即向來嘖
嘖煩言又何卹安服寵次報政多成餘冀善舍多祉不
宣

欽定四庫全書

九華集卷十四

宋 員興宗 撰

啓

賀何舍人運使啓

光奉綸言榮躋計府傳聞千里歡豫一辭竊以任官之
難莫如將漕之重必資巨德庶革弊原劒嶺千畦極遠
近賦輸之困龜城一道當西南旱暵之衝非仁人起而
救之其大勢可以憂矣忽聞休命相遂遠圖某官學企

前修職通異貫名盛而實甚副論高而用不疎詞令最
嫻言語妙乎天下起居得體風彩聳於羣臣驟輟邇班
來恩遠服重湖政舉特披夢澤之雲九頂化成再問峨
眉之月惟留滯寒鄉之久宜從容溫詔之頒爰陟使華
行驅民瘼某聞道有自受知獨深既見子雲奇字可識
獲親德秀世利都忘偶緣寒餓之驅遂致典刑之遠窮
懷易感撫敝橐以川流勝餞何時歸艤於日下

上王運使啓

猥以疎庸偶蒙器遇經品題於平子世不敢非承指畫
於柳州文皆有法勤書紳而自勵念揮麈以不忘伏值
某官道本周知仁無擇物數區中之賢而名最著容度
外之士而信不疑竭來謁大巫心共傾於高論我亦輕
餘子公豈挾於是心遂使荒孱例蒙甄錄謂其才疎意
廣不隨世範以驅馳憐其志老學迂頗識古書之正偽
特矯世俗屢形齒牙某敢不增益所不能敬修其可願
窮塗易感撫行橐以川流勝餞何期候歸艎於日下

與孫侍郎啓

光被綸言外臨藩服盡當世險易之節與時偕行得古人進退之風不可則止貴名甚白義路益清恭惟某官迪德無私剛中莫屈懷慷慨素蒲之義處雍容從橐之班動必宣心居常造膝謂言之必可行也務在有餘而道之將廢命歟蓋將有待方幸回天而展力俄因散地以均勞暫遠鷁行遂憑熊軾獨當一面曾何蜀道之深虞入為三公行復漢家之故事

代上侍郎啓

伏審光奉綸言榮升禁從凡依庇賴共切歡愉遂稱再
世之能臣豈特當朝之盛事頌一札十行於中禁掌五
材九範於左民恭惟某官學邃天倪心潛聖域外克詢
於王度上特選於世勞紫禁飛英青雲接武討論潤色
舊觀麟閣之書厚重忠純益峻象河之秩粵著經綸之
效果膺親切之除深惟少常伯之員進貳大司空之職
謂萬物雅資於繕治下綜百官而六曹誠繫於樞機行

躋兩地某壯懷蕭瑟倦翼低回幸復與於計臺慙無功
於利柄崎嶇末路敢期鵷鷺之行瞻望崇闌聊申鷺雀
之賀其為欣幸莫究頌言

遠迎楊尚書啟

某忝審尚書太學先生西乘鷁舫按臨舊部之江山南
指鳳城光顯中朝之日月拭目載瞻於履舄究心預慶
於鈞衡擁篲直前望塵敢後

謝蔣參政啟

恭惟叅政相公德望著世忠純在人家三徑以載清論
萬幾而中病文章爾雅炳制作於西京門地推高甲衣
冠於東渡猶退託無軒冕之意每加意採芻蕘之言致
茲孱愚亦預升進某敢不仰師餘論益廣前聞務推行
疇昔之言以終究事為之志素貧賤而行貧賤忍自慚
有守之初心知春秋而為春秋尚可紀無前之盛蹟過
此以往未知所裁

謝給事啟

恭惟給事直院英辭溢世絕學師心庶幾鄒魯之名家是蓋淵雲之故國謂朝廷擇士宜興孝以舉廉使天下同風庶回心而嚮道齒牙所逮羽翼借成自愧愚頑亦膺登選某敢不仰思盛德益勵菲材臣所知者鄉人乃蒙公舉我當報之國士倍切私忱感激所深名言非悉

回朱知郡啟

榮膺詔旨進典侯藩公路惟清貴名愈白竊以國家擇守先循良愷悌之人賢者報君無內外重輕之異若千

里之牧視九鼎則萬里之遠猶一家振古所難非才孰
可恭惟某官天資最劭地望推高文翰雍容益出三陳
之故里政術敏妙是誠兩蜀之通儒所臨擅一時之稱
譽者常四面而至果見絲綸之出再膺符竹之分申詠
袴襦有三戕之故事漸披荆棘化九隴於樂郊得衆之
歡非詞所既某承顏最舊集忭惟深仰慙風貌之崇先
枉雲緘之辱盡出客下公深得古列侯之風或遺予言
非所安愚不肖之分其為感激未既敷宣

上都大啟

伏審光奉綸言榮躋延閣見吉士遠人之增氣知盛德
大雅之可憑公路益清貴名逾白恭惟都運都大顯謨
先生受天間氣為世偉人朝論推能臣而甚高遠方託
明府以為命為善而不改其度豈間東西居官而無負
厥心敢分內外果致庶工之薦寵致茲華職之延登列
聖許謨醇乎醇而詔後大君有命新又新而得人俊塗
益聞公議交聳豈止守鉛黃之舊蓋將分朱紫之華漸

邇天閭先銀漢靈槎之泛行升秘殿煥青藜太乙之觀
某顧以非才幸叨下吏竊聆賢者之進退激懦夫之懷
割席求知願終始效任安之義登山見遠顧幽深愧裴
令之言少答鴻私先伸燕賀其為慶抃未究敷宣

謝湯大卿都大啓

竊以鄭舍無羶坐媿十年之困荆門有望甫傳一紙之
榮顧肺肝無絲髮之能而筆墨重丘山之賜伏惟都大
大卿先生才碩而敏氣沉以雄多聞過陳子之三高第

壓牧之之五

湯廷試
第四人

賢關高步蓋諸老莫為之先禁殿

程才舉羣臣無出其右進司風憲旋試月卿以江東南
之望人為帝左右之英選臺言正衆儼然望而畏之心
計利民特立有如此者比因眷命出總行臺蒙嶺萬綱
浩浩起摘山之綠渥洼千騎駸駸飛逸足之黃雖上心
倚重於西州然元老行歸於中禁某沉迷圖籍公襲箕
裘生平有孔文舉之疎一日蒙郭有道之盼嚮曲承於
點翰避不敢於循墻對先生而相與言願師至道微夫

子之發吾覆見笑畸人既賴埏鎔愈增踴躍

賀王丈遷都大兼漕啓

伏審榮升計府申莅茗司千里傳聞一詞懌豫百吏共
推於大手兩川將至於息肩必著宏規永驅宿弊恭惟
某官質據異稟學企前修出乎忠孝之故家辨若功名
之餘事一言一動無羣士篆刻之風百舉百能守先朝
篤老之論惟獨蘊於天而絕異故所臨之地而有聲大
盜驚心坐安西服小民引領卧治南充辟止辟而刑祥

心格心而吏畏果躋峻職益簡上心茗旂將擷於羣秀
之中有遺味矣驥窟行空於萬里之外無留良焉佇聆
異最之升重見修門之入某受才實散荷顧特恩久慙
東閣之遊退遂北堂之養既一生不得文字之力故百
舍不免簿書之勞身留空山日對小吏盼窮塗而甚感
望舊館以銜恩魂夢交馳典刑未遂驟聞好語豈敢賦
十離之詩已振敝冠固將卜三沐之見其為忻祝莫究
賀悰

與紹興師相賀冬至啓

律移舜琯陽已肇於吹葭節次周正日初長於添線恭
惟某官以民為念共慶暖律之回與國同休茂集純禧
之介某遠拘官守阻造賓閔展慶無階頌懷增極

與王師賀冬至啓

土圭測正想天道之默回官線加長欲人時之敬授日
在斗而南至歲守心而西穰君子哉若人先生者是事
恭惟某官運籌合意輔政同心五經總於石渠四時和

於玉燭風行屬部奠白鹽赤甲之區雲望清朝扶紫蓋
黃旗之運善調鼎鉉仰穆乾文

與汪國史賀冬至啓

日在牽牛而至宜申慶賀之年人謂沐猴而冠未及威
儀之著蓋四時之序則固和於玉燭然五經之辭則寢
選於石渠賴大賢靡所不容致小夫且以自立作為禮
使以有禮僅知漫刺之懷盡信書不如無書尤愧空函
之達幸貸顛狂之俗吏願憐謬誤之醉人永滌前愆實

資巨庇

與成都倅賀冬至啓

元天黃道肇四時玉燭之調畫閣紅爐蘊千炬金蓮之
用名為厚德若是其甚歟數僅平分得者或寡矣惠心
益施幸叨寬假之恩道氣復充宜慶綿長之福

代王提刑賀正與王顯謨啓

四序更端春王謹一元之始三陽屆候君子膺百祿之
宜恭惟某官學造道源智周物表惟帝左右一時曾變

於斯文莅川東西兩蜀今受其陰賜既兼被烏臺之薦
豈久淹馬政之司適履人正定膺福祉既後陳於祝頌
曾莫罄於悃悃

與路運使賀正啓

王政謹一元之始罔不若時君子順百祿之宜膺受多
福恭惟某官清時雅望奕世宏規衣冠聳京洛之餘出
乎其類襟韻挹岷峨之粹熙然似春既克阜於邦財宜
漸膺於帝眷首乘歲律備介春祺遠莫致於鄙悃慶徒

深於善頌

與王制置賀正啓

履端於始朝廷謹受朔之元求福不回君子得乘時之
義功由歲積道與日昇某官厚德鎮浮偉才經世典謨
潤色昔雍容為鴻閣之華屏翰藩宣今造次繫雪山之
重既純乎純而進德故事無事以得民衆望攸歸春祺
將介坐集寅正之祉時惟哲人漸符泰極之祥以興嗣
歲

與趙郡王賀正啓

爰紀夏正王人所謹載瞻魏闕治象惟新茲惟出滯之
辰宜集迎祥之慶某官信能處已智不違時衛社一心
亦庶幾於金氏輸忠萬里夫何慮於玉門既祚之土以
建邦又爵於朝以示遠永依樂土知塞草之長春敢祝
新祺擬椒花而進頌其為慶賀罔既敷宣

與王鈐轄賀正啓

三元肇歲時紀建寅之初萬寶回春人符交泰之象况

備一時之輿望宜膺百福而鼎來伏惟某官卓然英才
允矣世將傳聞北地樽俎可以折衝暫總西兵藜藿為
之不採適介人正之始茂膺天祉之多素著威稜若干
里風雷之駛即期帝澤更一番雨露之新慶忭之悰敷
陳罔既

回成都節推賀正啓

雞聲噉旦肇元日之獻圖龍德回春屬新年之納慶方
頌椒而愧後致簡竹以居先善其職而宜國人衆僚欽

仰為此酒以介眉壽五福繁昌

與普州知郡賀正啓

魯經紀事正標五始之文漢歷頒常寅總三元之統泰
韋交而迪吉履宜視以考祥恭惟某官月旦鄉評陽春
政術推誠贊化九天載想於玉龍治民奏功兩地行瞻
於金虎

回教官賀正啓

正月之吉始和務承休而無數夫子之道至大迺積德

以有容未遑韓斗之瞻首辱郇雲之貺爾愛羊我愛禮
推朔旦以表誠震為龍巽為風遇陽春而贊化

謝陳同知啓

恭惟樞密同知叅政德能澤物學本積躬以仁義為基
圖加文章而黼藻籌邊至略緼尺箠制敵之心仗節輸
忠懷九鼎重趙之意每見兩朝之譽處最更萬變以勤
勞意念報君莫如擇士至使迂愚之迹獲陪俊彥之遊
直道雖行大恩難稱仕固伸於知己敢主情偷書不足

以盡言聊形依頌過此以往未知所裁

上楊知府啓

義掩前聞名高勝社源本魯諸儒之學雍容漢循吏之風湖右政成一日掃茗旗之弊左綿化洽三秋無田甲之荒凡桃李所生之蹊皆衣冠共紀之政供養三百指怡愉有相浹之仁仕宦三十年造次無可愧之事每有噓枯之意不忘策蹇之思如某才地最凡性天不敏悵歲月纏悲之久動山林獨往之思昔以明經濫為蜀多

士之冠固嘗際禍幾有楚三閭之憂幸眷諸臺屢塵下
客既無補於規畫願改試於簿書期會公門世有以賤
為貴者從容樸學信不足使於前歟謹已遂於三熏行
有期於一顧其為忻幸罔既敷宣

謝差遣啓

託庇逾年仰想繡衣之重垂名異日洊蒙華袞之褒納
匿瑕藏疾之端示噓枯吹生之力誦言至止念德在茲
如某小智自私大惑不解蓋當益堅而當益壯懼輕招

辱而輕招憂以故處於拘拘謏謏之間庶或出乎擾擾
膠膠之外屬依牆仞獲與銓衡殆憐粵鑛以成金冀為
君子之器猶慮鄭聲而亂雅忽遺天下之材顧渭叟以
覲顏視商皓而擊節弗知圯上書矣況決稷下辨乎繫
吾徒不惟古之謀奈俗儒敗迺翁之事豈十數輩而易
得者仰千百載而難遇焉實慙淺聞誤玷妙選此蓋伏
遇某官性天溥博量海深沉拔英俊以強本朝有仁義
以利吾國老老而民興孝等差素辯於人倫貴貴而上

尊賢中飾特嚴於邦典未遂鼎調之命暫兼帥長之權
致令庸愚濫邀收錄某敢不佩韋衣褐食檠飲氷務恪
守於官箴用祇酬於恩造

投王顯謨啓

伏審光奉綸言榮升計府見羣士遠人之增氣信盛德
大雅之可憑公路惟清貴名愈白恭惟某官受天間氣
為世偉人以儒飾吏而術不踈以慮沉幾而物無蔽中
立不倚道弗係於榮枯曰思無邪心曷分於內外退盡

部刺史之能事果膺聖天子之簡求以公兩鎮外臺善
推明於德意而察九州循吏宿欽奉於詔條惟其愛民
可使裕國躬馳蜀道五年既棠蔭之多聲薄漢廷九扈
陟稼卿之貳俾恩遠服以阜邦財豈惟增益於縣官兼
可調護於諸將庶盡揚鞭之算行增秉軸之階某顧以
非才常叨下顧衣食遺母曾寬蓬戶之憂道德照人宿
韋珠庭之仰賴漸摩於至善每罄竭於微忠雖內顧其
百不堪當自誦其三宜去登山見遠顧幽深愧裴令之

言割席求知願終始效任安之義其為感激未既敷宣

賀漕使啓

遣使臣送以禮樂在車則聞鸞和之音化天下尚於中
和域民不以封疆之界譽久傳於鄉月象初顯於福星
其悅無疆乃終有慶恭惟某官廣湖器量長嘯才猷陝
以西二公主之斗以南一人而已英資孤竹昭昭賢德
之榮觸處甘棠赫赫吏能之著郵駟啓其行色著龜告
其吉辰豈惟轉漕於關中抑欲裕財於淮右為方千五

百里喜遇青春所隸一十六州欣逢白晝爰望塵而交
慶屬開府以為新席恐未溫詔應趣召即變調於梅鼎
永協贊於楓宸某下吏備員厚顏苟祿叟不遠千里方
切仁民而親親我獨有二天敢不尊賢而貴貴益深頌
詠罔既敷陳

上李漕啓

初心不武繆為千里之行末路甚恩近託二天之庇既
自塵俗吏之列敢妄意諸生之間乘大賢之得時與斯

民而共樂輒憑竿牘以候門牆恭以某官用在六經學
高三古窮原反本歸孟氏之醇乎醇成已立人如伊尹
之覺先覺餘波所及晚輩有憑久矣斯文之宗不勝其
貴獨於天下之器所取者庶去國五年承流三郡屬干
戈之警及於黎庶而錢穀之問至於廟堂迺奉明綸遠
將使指雖管仲徵求之藝公所不為然蕭何轉漕之勲
上豈忘報即儲善最歸綴清班某愚不適時官無佳况
昔礪璞以頑而就礪賴化手以成材今頭顱如此而遠

遊負平生之知己尚寸心之未折於門下以堪勤大厦
既成已作穿簾之燕一枝有託何愁遠月之烏

謝除教授啓

竊以勸善之地宜拔其穎而取其尤成功則天斯求有
道而得有命苟一旦投之於英俊之域則四方指其非
簿書之才樂矣文字之間興然塵埃之外日眠何害信
飽腹之便便官冷自如任諸公之衮衮遂其踈懶養此
衰愚是謂不貲之恩敢忘傾頌之意茲蓋伏遇某官斯

文宗伯吾道主盟常紬詞於班馬之間固弗論於晉魏
而下賈生奏議諸老皆莫能言田叔入朝廷臣無出其
右蓋泓渟涵浸之甚久故發揮振耀而每高僉揆通才
豈宜稱外歸帝左右將巖巖而具爾瞻顧蜀東西豈悵
悵而久留此斂百能而已具猶一士之不遺取於無心
得之有義既知其志於力學故受之芹藻之宮又察其
心於奉親故丐以斗升之祿非知我者誰或使之勉紹
至音務酣正味亦既以身而徇道先推所學以及人謹

鄉遂而令遠郊貴左尚右招諸生而立館下刮垢磨光
明素守於再三報所知之萬一

